

# Powšitkowne WOZJEWJENJA

njedźelu, 15. apryla 2018

## Serb dóstanje diakonsku swjećiznu

Biskop Heinrich Timmerevers wudźěli sobotu, 21. apryla, w 10 hodź. na Božej mši w Drježdžanskej katedrali Pětrej Mrózej z Kulowa diakonsku swjećiznu. Wšitcy wěriwi su na tutu Božu mšu přeprošeni a měli so za njeho kaž tež powšitkownje wo duchowny dorost modlić.

## Na měrowy swjedžen do Wostrowca!

Přećiwo prawicarskemu zetkanju we Wostrowcu k Hitlerowym narodninam napominaja nimo cyrkwe mnohe zwjazki, zo bychu so wot pjatka do njedźele, 20. do 22. apryla, w městačku nad Nysu na měrowym swjedženju wobdźělili. Towarstwo Cyrila a Metoda z.t. (TCM) je na swojej hłownej zhromadźiznje 19. měrca, w Ralbicach na nastork dekana Wita Sćapana wobzamknyło, zo tutón měrowy swjedžen podpěruje. „Njeh so mnozy wobdźěla. Z mnohimi druhimi zwuraznymi z tym, zo smy přećiwo rasizmej a ekstremizmej a zo zasadžamy so jako křesćenjo za tolerantnosć a za měr, we Wostrowcu runje tež na hranicy k Pólskej, kotraž je pod němskim nacionalsocializmom bojznje ćerpjeć dyrbjała“, praji předsyda TCM Jurij Špitank. Wón je po dorěčenju ze zarjadowarjami we Wostrowcu za sobotu, 21. apryla, bus skazał. Tón wotjědže w 10.10 hodź. z Radworja a pojedže na Ralbicy (10.30 hodź.), Chrósćicy (10.40 hodź.) a Budyšin (11.00 hodź.) do Wostrowca. Wottam pojedže wón wokoło 17.30 hodź. wróćo. Zajimcy měli so hač do pónđzele, 16. apryla, w redakciji Katolskeho Posoła přizjewić, telefonowe čisło (0 35 91) 550 212. Wobšěrny program měroweho swjedženja we Wostrowcu je pod [www.posol.de](http://www.posol.de) wozjewjeny. Mjez druhim su w klóštrje Marijinym dole dny wotewrjenych duri.

## Duchowna hudźba z gosplemi a spiritualem

Lipšćanski gospelowy chór pod nawodom Maika Gosdžinskeho wuhotuje njedźelu, 22. apryla, wuwzaćnje hižo w 17.00 hodź., w Budyskej cyrkwi Našeje lubeje knjenje „Duchownu hudźbu“. Zaklinča gosple a spirituale. Wšitcy su wutrobnje přeprošeni. Zastup je darmotny.

## Požohnowanje motorskich

Popołdno z požohnowanjom motorskich zahaji so njedźelu, 22. apryla, w 14 hodź. z nyšporom w Ralbičanskej cyrkwi. Přizamkne so zhromadny wulět.

## Beneficny koncert

Za wjacore socialne projekty w bołharskim měsće Razgradže přewjedže Towarstwo swjateje Filomeny z.t. njedźelu, 29. apryla, wot 14.30 hodź. we Łazku beneficny koncert. Mjez druhim wustupi Carolina Eyckec ze svojim tereminom. Koncert wuhotuja sobu Chrósćancy muzikanća, chór Delany a Smjerdžečanska rejwanska skupina.

## Poswjećą pomnik za Stanisława Błażejczuka

Na městnje něhdyšeje „krawneje chójny“ při lěsnym puću wot Łomska w směrje na Koslow wotměje so sobotu, 28. apryla, w 14 hodź. ekumeniska, němsko-serbsko-pólska nutrnosc. Na njej wotkryja wopomnjenski kamjeń za pólskeho džělačerja Stanisława Błażejczuka. Wón narodži so 27. julija 1915 we wuchodopólskim Witoldowje a bu na wopomnjenskim městnje 25. apryla 1942 wotprawjeny.

K tomu je wóndano wušła serbsko-němsko-pólska kniha „Row w serbskej holi – Das Grab in der Heide – Grób w łużyckiej kniei“ ze znatym powědančkom Marje Kubašec a z wuslědkami slědženjow Trudle Malinkoweje wo tutym zrudnym podawku, wo pólskim woporje nacionalsocializma a wo powědančku. W domizniskim muzeju w Njeswačidle tematizuja we wosebitej wustajeńcy wo času 1933 do 1945 tež wopomnjeće Stanisława Błażejczuka. Kniha budže tam na předań.

Na nutrnosc přeprašuja wutrobnje Njeswačanska wosada, zarjadnistwo gmejny Njeswačidło a Towarstwo přećelow kultury a domizny Njeswačidło z.t. Pomnik poswjećitaj Njeswačanska fararka Susanne Aechtner a Chróšćanski farar Měrćin Deleńk. Docpěć hodži so městno, hdyž napoť puća mjez Koslowom a Njeswačidłom naprawo do lěsa abo z Dobrošic přijěwši we Łomsku na pólny puć nalěwo wotbočiš a so něhdže poť kilometra do lěsa podaš. We Łomsku budže wotpowědne znamjo připrawjene.